

Un anochi cu Aruba su carnaval a bira den gran forma



ORANJESTAD – E ultimo eleccion a tuma luga diasabra ultimo y Aruba a disfruta di un tremendo show sin duda algun un biaha mas. Pero esnan cu mas a disfruta di esaki tabata e turistanan cu a forma parti di e miembronan di e hurado pa e anochi aki.

Hopi di nan no tabata tin ni 24 ora riba nos isla y a

haya nan ta forma parti di e evento cultural mas grandi durante di aña pa nos isla. Durante di cada presentacion, e presentacion di Coco Rico Dancers, e speech di cada un di e candidatanan, e turistanan aki y nan famianan cu tambe tabata presente den Aruba Entertainment Center tabata sumamente impresiona pa



loke cu nan tabata experiencia. Algun di nan a bisa cu no unicamente riba stage tabata tin show pa e wak pero entre cambio di e candidatanan e tabata bira wak e publico y esey tambe tabata algo masha impresionante. E forma con tur hende tabata biba cu e evento y cada candidata en particular ta algo cu nunca el a yega di wak prome. Un di nan procediendo di New York ya tin cinco aña caba ta bin Aruba pa e temporada aki y



a sinti e sumamente honra di por a fungi como hurado. El a disfruta di haci e trabou aki mirando cu el a sinti e parti di e comunidad completo y di e gran celebracion cu tanto e ta gusta.

Durante di e shownan di e candidatanan cada un di nan a duna e sabor di e celebracion di nos isla y tambe transmiti e alegria cu Aruba ta biba den dje practicamente durante di henter aña. Di e forma aki nan

a haci e carnaval di Aruba bira y biba pa semper den memoria di nos bishitantenan cu a bay nan hotel bek sumamente impresiona.

Pabien pa esaki no unicamente na e candidatanan pero tambe na cada un di nan cu a yuda cu e preparacion, diseño di cotume, coreografia di show y te hasta esnan cu a bin apoya. Ta boso, e pueblo Arubiano a haci nos carnaval briya den gran forma.

